

摘藻堂四庫全書薈要

集部

欽定四庫全書薈要卷一萬四千七百四十四

集部

臨川文集卷五十六

宋 王安石 撰

表

百寮賀復熙河路表

賜玉帶謝表

詔進所著文字謝表

進熙寧編勅表

賜元豐勅令格式表

賜弟安國及第謝表

除弟安國館職謝表

除雱中允崇政殿說書謝表

除雱正言待制表

進字說表

進洪範表

進修南郊勅式表

除知制誥謝表

知制誥知江寧府謝上表

除翰林學士謝表

賜衣帶等謝表

勅設謝表

百寮賀復熙河路表

臣某等言伏覩修復熙河洮泯疊宕等州幅員二千餘里斬獲不順蕃部一萬九千餘人招撫大小蕃族三十餘萬各降附者奮張天兵開斥王土旌旃所指燕及氐

羗樓櫓相望誕彌河隴

中賀

竊以三年鬼方之伐高宗

所以濟時六月獫狁之征宣王所以復古政由人舉道
與世升伏惟皇帝陛下溫恭而文睿知以武講周唐
之百度拔方虎於一言我陵我阿既飭鷹揚之旅實墉
實壑遂平鳥竄之戎用夏變夷以今準古是基新命厥
邁往圖臣等均被明恩具膺榮祿接千歲之統適遭會
於斯時上萬年之觴敢愆忘於故事臣無任

賜玉帶謝表

臣某言伏蒙聖恩以收復熙河洮岷疊宕等州特加褒
諭親解玉帶賜臣者尸臣列侍方臨極辨之朝誓御占
傳獨拜非常之賜寵綏狎至懇避弗俞焜耀有加凌兢
無措

中謝

竊以洮河之業兆自聖謨方虎之材進非師

錫片言投匭遂察見其有孚衆訛盈庭豫照知其無責
以至緩兵筭食蒐卒第功能畢協於始謀實仰歸於獨
斷如臣蕞爾何力有焉伏惟皇帝陛下善貸且成勞謙
不伐弛曠瘼之大責錄將明之小忠揚于廣除委以珍

御瑟彼英瑤之質煥乎華袞之言臨授用光顧榮踰於古昔退藏惟謹知燕及於雲來施更厚於解衣報敢忘於結草臣無任

詔進所著文字謝表

雲漢之光俯加賁冒管蒯之賤仰誤詢求

中謝

臣聞百

王之道雖殊其要不過於稽古六藝之文蓋缺所傳猶足以範民唯其測之而彌深故或習矣而不察紹明精義允屬昌時伏惟皇帝陛下有舜之文明有湯之勇

智以身為度動皆應於乾行肆筆成書言必稽於聖作
欲推闡先王之大道以新美天下之英材宜得醇儒使
陪休運臣初非秀穎衆謂迂愚徒以弱齡粗知強學服
膺前載但傳糟粕之餘追首大方豈逮室家之好過叨
睿獎使緝舊聞永惟少作可棄之浮辭豈能上副劬搜
之至意伏望皇帝陛下矜其聞道之晚假以厯時之
淹使更討論粗如成就然後上塵於聰覽且復取決於
聖裁庶收寸長稍副時用臣無任

進熙寧編勅表

臣某等言竊以觀天下之至動而御其時輔萬物之自然而節其性匿而不可不為者事麤而不可不陳者法厥惟無弊乃以不膠故造象於正月之始和改禮以五載之巡狩一代之典成於緝熙百世可知在所加損方裁成輔相之休運宜修飾潤色之難能顧匪其人與於此選中謝蓋聞道有升降政有弛張緩急詳略度宜而已使民不倦唯聖為能伏惟皇帝陛下天德地業體

堯蹈禹永念憲禁之舊或失防範之中選建有官付之
論定具慙淺學莫副詳延屢彌歲年僅就篇帙刪除煩
複蒐補闕遺於趣時因民則粗抹抗蔽之實以方古垂
後則或俟新美之才冒昧大威姑塞明詔

賜元豐勅令格式表

臣某言伏蒙聖慈特賜臣元豐勅令格式一部計四
十策者新厥品章著之方冊雖孤眷寄尚冒分頒

中謝

竊以后辟之所訓裁臣工之所承守歷觀既往或仍躋

駁之餘緒正厥遺實待緝熙之久恭惟皇帝陛下操
天縱之智御物昌之時勅法於羣幾之先收功於異論
之後慮無愆素舉必要終然趨變以制宜或非初令則
取新而垂裕宜有成書神機俯授於有官聖制遂攄於
無極部居彪列科指昉分雲漢之回甚昭日月之照方
久臣進陪國論退即里居在昔討論嘗負曠療之責於
今尊閣更知被受之榮臣無任

賜弟安國及第謝表

臣某言伏蒙聖恩召試臣弟安國賜進士及第注初

等職官者雋乂之求外覃草野龍光之施首逮門庭

中

謝

竊以躬國論聽斷之煩而察知孤遠之行略門資貢

舉之法而拔取滯淹之才山林之所誦說而難遭閭巷
之所驚嗟而罕見伏惟皇帝陛下協德穹昊比明羲
皇博臨四方洞照萬物如臣同產為世畸人少遭閔凶
自奮寒苦雖強學力行粗有時名而少偶寡徒幾絕榮
望豈期聖聽俯及幽潛遂使窮途坐階華寵獎以詔書

而試藝賜之科第而命官祿不逮親既永乖於養志仕
非為已當共誓於捐軀臣無任

除弟安國館職謝表

臣某言伏蒙聖恩以臣弟安國充崇文院校書者書
林置職方儲高位之材詔板推恩遂假私門之寵在於
疵賤實以兢慙中謝伏念臣初起孤生非謀膺仕中參
近侍特荷先朝屬憂患之相仍分湮淪而自弃敢圖收
召俯暨幽潛服在臣鄰驟冠論思之列恩加子弟具膺

慶賞之延有昧冒於殊私或超踰於常法惟數奇之同
產嘗久困於稠人第冊西垣比前叨於睿獎校文東觀
更曲被於明揚此蓋伏遇皇帝陛下與善無方便能以
類欲阜成於大治務博取於衆材遂忘形迹之嫌以溥
龍光之施哀宗既亢唯知上報之難小已易盈彌懼先
顛之疾臣無任

除雱中允崇政殿說書謝表

臣某言伏蒙聖恩授臣男雱守太子中允充崇政殿

說書尋具劄子辭免蒙降詔書不允者恩驟加於私室多所超踰事或累於公朝誠難昧冒仰煩睿訓曲喻至懷永惟眷獎之殊實重兢慙之至

中謝

伏念臣首叨

召節得侍辭林隨被贊書使陪經幄稍更歲月莫補涓埃竊觀上智之日躋內訟淺聞而知困况如賤息厥有童心尚迷鑽仰之方豈稱招延之禮恕已量主非敢以私而自嫌為官擇人顧雖成命而宜改輒布可辭之義上干難犯之威伏蒙皇帝陛下屈體優容坐精寵荅謂

大人照臨之道廣當養以蒙意小夫誦說之智專遽忘其賤褻稱備厚訓飭加嚴揣實未安寄顏有惡重念自古君臣之相與未有如臣父子之所遭蓋當用儒之時尤難講藝之職典謨方御實參備於討論誥誓未終已繼叨於獎擢獲世官於閭巷嗣家學於朝廷自非忘軀何以報國知人而官以哲慨已誤於明揚委質而教之忠誓永肩於素守臣無任

除零正言待制謝表

臣某言伏奉聖恩除臣男霽右正言天章閣待制兼侍講特降中使宣諭令便受告勅不須辭免者乎號明恩實由中出美官要職弗以次加知榮耀之及私顧僭差而累國雲天在望冰炭交懷

中謝

臣出於羈窮好是

拙直道常違俗宜芻狗之致妖才不逮人何藿蠋之能化皇帝陛下收之末路付以繁機距滔天之衆讒責經世之來效施及賤息度越稠人延登朝行使嗣講業方仰陪於膝席俄中廢於鼯瘍雖進趨之禮久妨而問

勞之恩狎至莫知報稱但負兢慙豈意眷憐更加超擢
待制之為職以陪侍禁嚴正言之為官以諫救遺失承
金華之舊學親玉色於燕朝併叨殊私甚駭羣聽此蓋
伏遇皇帝陛下攬取同智無小大之遺搜揚衆材無
久近之間苟或不肖槩嘗有聞必垂甄收以示勸獎四
方之訓于我無競維人多士之生斯時不顯亦世永惟
遭值孰與等夷君臣以事道相求是惟希世父子以傳
經見用鮮或同時雖愧臯陶濟美之材敢忘孤突教忠

之義臣無任

進字說表

臣某言竊以書用於世久矣先王立學以教之設官以達之置使以喻之禁誅亂名豈苟然哉凡以同道德之歸一名法之守而已道衰以隱官失學廢循而發之實在聖時豈臣愚懂敢逮斯事中謝蓋聞物生而有情情發而為聲聲以類合皆足相知人聲為言述以為字字雖人之所制本實出於自然鳳鳥有文河圖有畫非人

為也人則效此故上下內外初終前後中偏左右自然之位也衡衰曲直耦重交析反缺倒仄自然之形也發歛呼吸抑揚合散虛實清濁自然之聲也可視而知可聽而思自然之義也以義自然故僊聖所宅雖殊方域言音乖離點畫不同譯而通之其義一也道有升降文物隨之時變事異書名或改原出要歸亦無二焉乃若知之所不能與思之所不能至則雖非即此而可證亦非舍此而能學蓋唯天下之至神為能究此伏惟皇帝

陛下體元用妙該極象數稽古初法紹天覺民乃惟茲
學墮缺弗嗣因任衆智微明顯隱蓋將以祈合乎神旨
者布之海內衆妙所寄窮之實難而臣頃御燕閒親承
訓敕抱痾負憂久無所成雖嘗有獻大懼冒浼退復自
力用忘疾憊咨諏討論博盡所疑冀或消塵有助深崇
謹勒成字說二十四卷隨表上進以聞臣某誠惶誠懼
頓首謹言

進洪範表

臣某言臣聞天下之物小大有彛後先有倫叙者天之道叙之者人之道天命聖人以叙之而聖人必考古成已然後以所嘗學措之事業為天下利苟非其時道不虛行

中謝

伏惟皇帝陛下德義之高術智之明足以

黜天下之鬼瑣而興其豪傑以圖堯禹大平之治而朝廷未化海內未服綱紀憲令尚或紛如意者殆當考箕子之所述以深發獨智趣時應物故也臣嘗以蕪廢腐餘之學得備論思勸講之官擢與大政又彌寒暑勲績

不效俛仰甚慚謹取舊所著洪範傳刪潤繕寫輒以草芥之微求裕天地臣無任

進修南郊勅式表

郊丘事重筆削才難猥以微能叨承遴選

中謝

蓋聞孝

以配天為大聖以饗帝為能越我百年之休明因時五代之流弊前期戒具人輒為之騷然臨祭視成事或幾乎率爾蓋已行之品式曾莫紀於官司故國家講燎禋之上儀而臣等承撰次之明詔迨茲彌歲僅乃終篇猶

因用於故常特刪除其紛冗恭惟皇帝陛下體聖神
之質志文武之功嘉與俊髦靈承穹昊物方鬯茂以薦
信而無慙人且昭明知因陋之為恥固將制禮作樂以
復周唐之舊豈終循誦習傳而守秦漢之餘則斯書也
譬大輅之椎輪與明堂之營窟推本知變實有考於將
來隨時施宜亦不為乎無補臣無任

除知制誥謝表

臣某言今月初二日伏蒙聖恩賜臣誥勅除臣知制

誥者高華之選欲報常艱固陋之身以榮為懼

中謝竊

以自昔招智能之士因使為侍從之官豈特賴其虛名
謂能華國蓋將收其實用相與致君矧號令文章之為
難而討論潤色之所寄苟失職不稱則為時起羞伏惟
皇帝陛下躬上聖之姿撫久安之運趣時有救弊之急
守器有持盈之難當得俊良使陪遺忘則典司明命出
入禁門一有瘕官尤為累上臣羈單賤士樸鄙常人仕
初有志於養親學遂不專於為已比更煩使稍竊謬恩

內懷尸祿之慙仰負食功之意又蒙採擢以致超踰蓋君之視臣不使同犬馬之賤則下之報上亦欲致岡陵之崇況臣少習藝文粗知名教遭逢一旦度越衆人唯當盡節於明時豈敢尚懷於私計臣無任

知制誥知江寧府謝上表

稽違詔令經涉歲時先帝登遐既不獲奔馳道路陛下即位又未嘗瞻望闕廷所憂後至之刑誅敢冀就加於官使雖知黽勉尚懼顛隳

中謝

蓋聞因任以責羣材

原省以通衆志厥或抱能而可用則雖負疾而見容如
臣者逮侍先朝叨官外制惓惓許國雖有愚忠沒沒隨
人但尸榮祿銜哀去位嬰疾彌年望絕寵光分投冗散
伏遇皇帝陛下紹膺尊極俯燭幽微延之以三節之
嚴付之以十城之重比緣禋祀特有褒封申命曲加因
郵併賜唯是土風之美素無犴獄之煩久寄託於丘墳
粗諳知其閭里念雖閉閣殆弗廢於承流以比造朝或
未妨於養疾矧恩勤之已迫且遜避之不容敢不少嘗

體力之所任祇奉詔條而為治冀逃大戾仰稱殊私臣
無任

除翰林學士謝表

臣聞人臣之事主患在不知學術而居寵有味冒之心
人主之畜臣患在不察名實而聽言無惻怛之意此有
天下國家者所以難於任使而有道德者亦所以難於
進取也學士職親地要而以討論諷議為官非夫遠足
以知先王近足以見當世忠厚篤實廉恥之操足以咨

諏而不疑草創潤色文章之才足以付託而無負則在此位為無以稱如臣不肖涉道未優初無聲聲過人之才徒有區區自守之善以至將順建明之大體則或踈闊淺陋而不知加以憂傷疾病久棄里閭辭命之習蕪廢積年黽勉一州已為忝冒禁林之選豈所堪任伏惟皇帝陛下躬聖德承聖緒於羣臣賢不肖已知考慎而於言也又能虛已以聽之故聰明睿知神武之實已見於行事日月未久而天下翹首企踵以望唐虞成周之

太平臣於此時實被收召所以許國義當如何敢不磨礪淬濯已衰之心紬繹溫尋久廢之學上以備顧問之所及下以供職司之所守臣無任

賜衣帶等謝表

出大庭之顯服束以精鏐引內廐之名駒傳之錯采隆恩所逮朽質知榮

中謝

竊念臣弱力淺聞久憂積疢中

與從官之選外分守將之權僅免譴訶更蒙收召論思潤色曾莫効於微勞衣被服乘乃前叨於異數此蓋伏

遇皇帝陛下醲於慶賞詳在招延因示眷懷使知奮勵誓竭愚忠之報冀無虛授之嫌臣無任

勅設謝表

職與論思恩加豪飫禮雖有舊寵實難當

中謝

伏念臣

本乏才稱中緣疾廢適從孤遠獲侍清光已汙禁林之廬重叨太官之賜蓋飲食有文王之雅實始憂勤顧來歸無吉甫之勞徒多燕喜敢忘自竭粗稱所蒙臣無任

臨川文集卷五十六

欽定四庫全書薈要卷一萬四千七百四十五

集部

臨川文集卷五十七

宋 王安石 撰

表

辭免叅知政事表

除叅知政事謝表

辭免平章事監修國史表二道

除平章事監修國史謝表

遷入東府賜御筵謝表

觀文殿學士知江寧府謝上表

辭免除平章事昭文館大學士表二道

除平章事昭文館大學士謝表

辭免左僕射表二道

除左僕射謝表

辭免使相判江寧府表二道

除集禧觀使乞免使相表

進聖節功德疏右語四

辭免參知政事表

臣某言伏奉制命特授臣右諫議大夫參知政事餘如故者才薄望輕恩隆責重敢緣聰聽冒進忱辭

中謝竊

以建用宗工與圖大政以人賢否為世盛衰矧休運之有開須偉材而為輔豈容虛受以誤明揚如臣者承學未優知方尤晚先朝備位每懷竊食之慙故里服喪重困采薪之疾皇帝陛下紹膺皇統俯記孤忠付之方面之權還之禁林之地固已人言之可畏豈云國論之敢

知忽被寵靈滋懷媿恐伏望皇帝陛下考慎所與燭知不能許還謬恩以允公議庶少安於鄙分無甚累於聖時臣無任

除叅知政事謝表

承弼之任賢智所難顧惟缺然何以堪此仰膺成命弗獲固辭

中謝

竊以古先哲王考慎厥輔皆有一德用成

衆功伏惟皇帝陛下含獨見之明踐久安之運甫終諒闇將大施為宜得偉人與圖庶政如臣者徒以承學

粗知義方本無它長可備官使退安私室自絕榮塗既
負米薪之憂因逃竊位之責大明繼燭正路宏開付以
蕃宣還之侍從清閒之宴或賜開延淺陋所聞每蒙知
獎以為奉令承教庶幾無尤至於當軸處中良非所稱
寵光曲被震媿交懷此蓋伏遇皇帝陛下德懋旁求
志存遠舉隆寬盡下故忠良有以輸心公聽並觀故讒
慝不能肆志矧睿謀之天縱方聖治之日躋思稱所蒙
敢忘自竭遠猷經國雖或媿於前修直道事君期不墮

於素守臣無任

辭免平章事監修國史表

材薄位高恩隆責重輒敷悃款仰瀆睿明

中謝

臣聞大

有為之君必考慎厥相趣舍施設相與如一乃能協濟
功治永綏黎元伏惟唐虞三代之迹滅熄久矣天錫皇
帝陛下以上聖之才修身齊家外正天下典謨所紀
風雅所歌以今揆古未有慙德宜求碩輔朝夕左右率
勵衆志輔成太平如臣區區孤陋淺拙知學以為已而

昧於趣時聞以道事君而謬於合衆與聞大政已積疵
瑕伏望皇帝陛下量能賦任使無譴尤追還誤恩以
協公議臣無任

二

臣某言臣近上表辭免恩命伏蒙聖慈特降批答不
允者天地之施厚矣不貲螻蟻之情微而未達重煩獎
訓彌集震兢中謝臣聞論德序官明主所以御世度能
就位忠臣所以事君臣偶以薄材過私榮祿雖以捐軀

而自誓顧於諉上而多慙竊觀聖制之所以褒揚終非
朽質之所能副稱矧叨任遇稍厯歲時必欲詭責其後
勲謂宜考觀於已事今內或怵竒褻之俗無喻德宣譽
之忠外或扇苟簡之風有犯令陵政之悖百姓以安平
無事之時而未免流離餓莩四夷以衰弱僅存之勢而
猶能跋扈飛揚皇帝陛下以聖人之高材有天下之
利勢憂勤已積功化未昭此亦由臣陳力就列以來不
能助國立經陳紀之故方謀自弛以謝素餐豈意誤恩

更加崇秩誠憂官謗能上累於明時所望天慈遂敕還於新命庶以通賢者之路且又協衆人之言臣無任

除平章事監修國史謝表

臣某言伏奉恩命特授金紫光祿大夫行尚書禮部侍郎同中書門下平章事監修國史上柱國進封開國公加食邑一千戶實封四百戶仍賜推忠協謀佐理功臣尋具表陳免蒙批答不允仍斷來章者揚于大廷寵以高位歸之翊戴之重諉之宰制之平聖心方慎於旁

求小已知難於上稱

中謝

臣聞人君代天而理物人臣

資父以事君然而君臣之大義有方非若父子之至恩
無間須倡而後和則誠意每患於難通不入而後量則
忠力或嫌於自獻唯成湯之聽伊尹與傳說之遇高宗
皆以䟽遠而相求何其親厚之獨至蓋所趣非由於二
道故所為若出於一身夫豈於越夷貉之異心是謂元
首股肱之同體二臣既以此獲展事君之義兩君亦以
此得成理物之功苟非其人孰與於此臣受材單寡逢

運休明初涉獵於藝文稍扳緣於祿仕曩塵近侍積
媿空餐悲遽隔於庭闈分長依於丘壠俄值纂承之慶
繼叨收召之榮責以論經尚少知於訓詁使之與政曾
莫助於猷為矧以拙直而見知遂為姦回之所忌伏遇
皇帝陛下納之以天地之量照之以日月之明數加獎
勵之恩每辨讒誣之巧重遭卜相申救備官終遜避之
無繇更兢慙於非據伏惟皇帝陛下樂古訓之獲而忘
其勢惡邪辭之害而斷以心勿貳於任賢務本以除惡

使萬邦有共惟帝臣之志萬姓有一哉王心之言則進
無求名之私退有補過之善臣之願也天實臨之臣無
任

遷入東府賜御筵謝表

伏奉差中使傳宣今月七日辰時三刻遷入新府并借
宮軍就賜御筵者恩厚不貲誠優賢之務稱頑冥無似
欲報國而知難

中謝

臣等過以凡材並膺殊選久壅賢

路上孤聖時伏惟皇帝陛下謀德在容求仁以恕謂

大臣方宣勞於王室則上主當加恤其私家發使禁闥之中視圖魏闕之下取材置臬一皆斷於睿謀成事告功初不煩於宰旅重紆衡蓋周視庭除申以中人喻之良月使及日辰之吉即于堂寢之安輟車府之傍牽載其帑重移饗官之亨割侑以鼓歌歡更逮於邇臣寵已加於小已陰陽或謬未知燮理之方風雨其除徒賴帡幪之賜臣無任

觀文殿學士知江寧府謝上表

臣某言伏奉制命授臣觀文殿學士吏部尚書知江寧軍府事臣已於六月十五日到任訖久妨賢路上負聖時苟逃放殛之刑更濫褒揚之典逸其犬馬將盡之力寵以丘墓所寄之邦仰荷恩私皆踰分願

中謝

臣操

行不足以悅衆學術不足以趣時獨知義命之安敢望功名之會值遭興運揔領繁機惟睿廣之日躋顧卑凡而坐困秋水方至因知海若之難窮大明既升豈宜爝火之弗熄加以精力耗於事為之衆罪戾積於歲月之

多雖恃含垢之寬終懷覆餗之懼伏蒙陛下志存善貸
為在曲成記其事國之微誠閔其籲天之至懇撓黜幽
之常法示從欲之至仁經體贊元廢任莫追於既往承
流宣化收功尚冀於方來臣無任

辭免除平章事昭文館大學士表

臣某言為君所艱尤慎厥與命相不善將壞于成矧當
責實之時敢替知難之義

中謝

臣知不足以遠學不

足以窮深比誤國恩嘗尸宰事初無薄効稱萬一之裒

揚止有多言煩再三之辨釋終逃譴負實賴保全恭惟
皇帝陛下若古以堯之欽明御今以禹之勤儉矜修積
美山無一簣之虧因任致隆臺存九層之累小大祇若
遐邇允懷畬而不蓄雖或許其繼事灌以既雨豈不昧
於知時況惟疲曳之餘過重休明之累且用人而過矣
固不免於敗材苟改命而當焉亦何嫌於反汗敢期聖
哲俯亮愚忠

臣某言臣近上表辭免恩命伏蒙聖慈特降批荅不
允者愚誠盡布所冀矜從聖志未移申加獎訓輒守可
辭之義更干難犯之威

中謝

臣聞冢宰之於周則曰統

百官而均四海丞相之於漢亦以附百姓而撫四夷位
尊則自古以然材薄則其何能稱臣之所守未有以過
人臣之所知又不足盡物姑使承流宣化託備蕃維或
令補闕拾遺追叅侍從尚能罄竭小補緒餘若乃秉操
鈞衡承輔樞極仰陪休運俯稱具瞻事已試而可知力

弗能而當止苟不量鼎寶之所任必且致棟橈於斯時
伏望皇帝陛下隨其器能付以職事圖惟大任改命上
材則熒爝末光不獲干時之咎棖楹近用亦叅構厦之
功

除平章事昭文館大學士謝表

臣某言伏奉制命特授臣同中書門下平章事昭文館
大學士兼譯經潤文使加食邑一千戶食實封四百戶
仍改賜推忠協謀同德佐理功臣尋具表陳免蒙降

批答不允仍斷來章者承流宣化方虞失職之誅經體

贊元更悞選賢之舉

中謝

臣竊惟人物之會通常寡實

以君臣之遇合至難自匪同聲氣之求孰能偕功名之
享伏惟皇帝陛下天縱大聖人與成能乘百年久安
之機飭千歲積壞之蠱士誠服矣而持祿養交之習未
殄民允懷矣而樂事勸功之志未純近或長阨而仁義
之澤未流遠或虛僞而道德之威未立宜選於衆舉格
于皇天之材使暨乃僚績迪我高后之事冀勝所任以

濟斯時而臣蚤見知於隱約之中久獨立於傾搖之上
勲庸弗效恩禮更加託備外藩俯鄰暮歲遂叨詔獎還
冠宰司自視羈單所懷蹇淺方古耕築則有其陋為世
聘求則無其賢然以投老之軀而遭難值之運苟貪歲
月趣就消埃且上之施既光則下之報宜厚與之勑力
仰承睿知之臨罔不同心俯賴忠良之協誓殫䟽拙圖
稱休明臣無任

辭左僕射表

臣某言近累具劄子辭免恩命伏蒙聖慈特賜詔書不
允者賞典越踰訓辭稠疊渙汗所被是為至榮朽材難
勝更以多懼輒輸危悃敢冒威尊中謝竊以左相位崇

東臺地要雖置負而久曠蓋授任之常難臣晚值聖時
久妨賢路奉揚成命螽力困於負山敷釋微言蠡智窮
於測海方譴何之為畏豈寵獎之敢圖忽此兼叨夙無
前比深惟淺薄仰累休明伏望聖慈俯昭愚款斷從公
論追寢誤恩豈惟私義之獲安實亦物情之歸允臣無

任

二

臣某言近具表辭免恩命伏蒙聖慈特降批答不允者恩言狎至鄙守難移敢冒德威更陳私義

中謝

竊

以高秩厚禮以疇莫盛之勲勞綿力薄材豈稱非常之爵寵人之所畏物有固然臣議行見知而涉世多為衆毀論材受任而居官無以自昭顧惟屈首受書幾至殘生傷性逮承聖問乃知北海之難窮比釋微言更悟南

箕之無實疏榮特異揣分非宜苟叨昧以自安懼譴
尤之隨至伏望皇帝陛下俯矜危拙曲賜全安不以
反汗之小嫌為能累國則是捐軀之大節實在報君
臣無任

除左僕射謝表

臣某言伏奉制命特授臣尚書左僕射兼門下侍郎
同中書門下平章事昭文館大學士兼譯經潤文使
加食邑一千戶食實封四百戶臣累具辭免伏蒙聖慈

特降批答不允仍斷來章者貳令中臺兼官左省惟時

遴選蓋嘗久曠而弗除忽此叨居顧豈微勞之可稱陪

敦厥邑敷告于廷是皆至榮難以虛辱

中謝

竊以經術

造士實始盛王之時偽說誣民是為衰世之俗蓋上無

躬教立道之明辟則下有私學亂治之姦氓然孔氏以

羈臣而興未喪之文孟子以游士而承既沒之聖異端

雖作精義尚存逮更煨燼之災遂失源流之正章句之

文勝質傳注之博溺心此淫辭設行之所由昌而妙道

至言之所為隱篤生上主純佑下民成能協乎人謀
將聖出乎天縱作於心而害事放斥幾殫通於道以治
官延登既衆尚懼膠庠之黎獻未昭典籍之羣疑乃集
師儒具論科指繕書來上褒典俯加臣趣操弗高知識
尤淺少嘗勤苦但為裘氏之吟晚更耄衰豈免輪人之
議初備使令之乏即知稱愜之難敢意誤恩獨當殊獎
此蓋伏遇皇帝陛下以化民成俗為事故急在誨人
以尊德樂道為懷故易於縻爵因忘固陋特假龍光祇

服訓辭深惟報禮雖無博學對揚稽古之鴻名庶以雅言助廣右文之美化臣無任

辭免使相判江寧府表

臣某言伏奉制命特授檢校太傅依前尚書左僕射同中書門下平章事使持節都督洪州諸軍事充鎮南節度管内觀察處置使判江寧府加食邑一千戶食實封四百戶仍改賜推誠保德崇仁翊戴功臣者恩典有加事勞弗稱陳力況難於黽勉輸情終冀於矜哀

中謝

伏念臣晚出窮鄉首陪興運恕心量已雖知容膝之易
安營職趣時更似絕筋而稱力既及眊衰而成疾重遭
憂釁以傷生姑欲補完唯當休惕若任州藩之寄仍兼
將相之崇是為擇地以自營非復籲天之素志伏望皇
帝陛下追還渙號俯徇愚衷許守本官退依先壟儻憐
積歲叅大議於廣朝或賜誤恩食舊勞於外觀尚繫眷
獎非敢干祈臣無任

二

臣某言近具表辭免恩命伏蒙聖慈批答不允者寵私未憊更加褒勉之恩分義所存敢冒叨貪之恥

中謝

伏

念臣江湖一介特荷聖知帷幄七年再陪國論久居亢滿所以深懼災危積至衰疲所以懇辭機要若猶尸將相之厚祿且復殿方面之大邦則是於惡盈之時欲富而弗止以宣力之地養痾而自營聖慈雖或優容官謗何由解免伏望皇帝陛下俯垂念聽特賜矜從使盛世無虛授之嫌孤臣有少安之幸臣無任

除集禧觀使乞免使相表

臣某言近具表乞以本官充使伏蒙聖慈特降詔書
不允者愚誠屢黷方負憂兢聖聽未移更加獎勵顧仰
關於國體敢終冒於天威

中謝

伏念臣頃汙近司久虛

大受晚罹疾疢自當辭祿而里居尚恃眷憐故敢祈恩
而家食將相之為重寄朝野之所具瞻若免於事任之
勞而尸此名器之寵在昔之茂勲明德尚莫敢居如臣
之綿力薄材宜宜非據伏望皇帝陛下俯矜危懇追

寢誤恩豈惟私義之所安是固物情之衆允臣無任

進聖節功德疏右語

臣竊以紹皇策以降神千齡莫擬歸寶坊而獻福萬寓
惟均矧荷眷之特殊固輸誠之獨至伏願三靈協祐十
力證知常儲有美之祥永御無疆之厯臣無任

二

臣竊以星虹獻瑞實啓聖於嘉時鍾明乞靈敢歸誠於
妙道伏願備膺多福大庇羣生人永恬愉之安物無疵

癘之苦天枝彌茂神睠具依臣無任

三

臣竊以誕降聖神適天人之嘉會虔祈祉福乃臣子之至情伏願萬寶偕昌三靈協慶永御無疆之寶厯丕承未艾之閑休臣無任

四

臣伏以握符踐運與時物以偕昌歸德謝生在情文而莫稱敢憑慈祐申祝壽祺伏願皇帝陛下筭比天崇業

侔地富常御華胥之至樂永錫皇極於黎元臣無任

臨川文集卷五十七

謹案卷五十五第四頁前六行魏貫充中書守闕
主事刊本闕訛闕據後文改

第十五頁前二行有足哀矜刊本矜訛務今改

卷五十六第十五頁前七行僅免譴訶刊本訶訛

何據宋文鑑改





總校官庶吉士臣張能照

校對官檢討臣龔大萬

謄錄監生臣張子誠

欽定四庫全書薈要

集部

臨川文集卷五十八至
六十



詳校官助教_臣常循

欽定四庫全書薈要卷一萬四千七百四十六

集部

臨川文集卷五十八

宋 王安石 撰

表

封舒國公謝表

除依前左僕射觀文殿大學士集禧觀使謝表

朱炎傳聖旨令視府事謝表

差弟安上傳旨令授勅命不須辭免謝表

孫珪傳宣許罷節鉞謝表

封荊國公謝表

賀貴妃進位表

賀生皇子表六道

賀魏國大長公主禮成表

賀冀國大長公主出降表

賀魯國大長公主出降表

賀康復表

賀南郊禮畢肆赦表二道

賀明堂禮畢肆赦表

封舒國公謝表

臣某言伏奉制命特授開府儀同三司封舒國公者發
號端門外覃慶賜䟽恩列辟俯逮空飡舞手均歡捫心
獨幸

中謝

伏念臣久孤眷遇當即譴訶曠歲籲天尚辭

榮而未獲新恩賜國仍席寵以有加唯茲邦土之名乃
昔宦遊之壤久陶聖化非復魯僖之所懲積習仁風乃
嘗朱邑之見愛鴻私所被朽質更榮此蓋皇帝陛下

道冒羣才彌天之所覆恩涵庶品并物之所包以釐事
備於郊宮而惠澤均於海宇故雖幽屏弗以遐遺顧冒
昧之不貲豈糜捐之可報臣無任

除依前左僕射觀文殿大學士集禧觀使謝
表

臣某言伏奉制命除授依前行尚書左僕射充觀文殿
大學士集禧觀使者屢黷天威坐彌年所曲從危懇仰
荷至慈中謝伏念臣學止求心行多違俗少隨官牒徒

有志於養親晚誤聖知欲忘身而許國疲曳久瘵於宰
事閔凶適在於私門中解繁機特上煩於矜惻外分憂
寄復難強於支持方累鴻私更尸殊寵既兢慙於非據
輒冒昧以終辭伏蒙陛下示以優容屢垂訓獎赦其逋
慢終賜矜全猶加祕殿之隆名俯慰窮閭之哀疾地崇
祿厚尚非空食之所宜歲晚力憊雖欲捐軀而曷報臣
無任

朱炎傳聖旨令視府事謝表

臣某言三月二日提舉江南路太常丞朱炎傳聖旨令臣便視府事者使指遄臻訓詞俯逮敢圖衰疾尚誤眷

存

中謝

伏念臣曲荷搜揚久孤付屬有能必獻未嘗擇

事而辭難無力可陳乃始籲天而求佚然方焦思有為之日以此懷恩未報之身苟營燕安豈免慙悸伏蒙陛下仁惟求舊義不忘遐乃因乘輅將命之臣更喻推轂授方之意踦履無用誠弗忍於棄捐朽株匪材尚奚勝於器使永惟獎勵徒誓縻捐臣無任

差弟安上傳旨令授勅命不須辭免謝表

臣某言伏蒙聖恩差弟安上提點江南東路刑獄以
臣衰疾就令照管仍傳聖旨令臣便授勅命更不須
辭免者江海衰殘雲天悠遠恩言狎至感涕交流

中謝

伏念臣積荷知憐初無報稱豈圖賤質上簡聖心數遣
中人間因外使喻以眷懷之至意慰其憂苦之餘生惠
焉既久而彌加告矣雖頑而未捨乃至召見同產馳賜
十行之書使營私門就捐一路之寄訪逮纖悉矜及隱

微追千載之遭逢殆無前比顧百身之糜殞安可仰酬
唯當祇聖訓之鴻私豈敢固愚衷之小諒重念無傷於
國體乃為不負於天慈欲以里居之安而尸官廩之厚
固已犯明義而累食功之實況復干隆名而長昧利之
風至於詞窮雖兢慙於屢黷可以理奪終冀幸於矜從
臣無任

孫珪傳宣許罷節鉞謝表

臣某言二月二十二日江東轉運使孫珪到府伏奉

聖慈宣諭以臣誠請甚確志不可奪故罷節鉞春時更
宜慎愛者囊封屢黷特荷矜從使傳載馳重煩慰撫

中

謝

伏念臣久尸名寵莫報恩私既逃不職之誅更竊無
功之祿閉門養疾曾未慙於朝榮擊壤歌時顧難忘於
聖力伏蒙皇帝陛下義惟求舊仁不弃遐故雖簪屨
之遺尚蒙簡記曾是筋骸之束敢愛縻捐臣無任

封荊國公謝表

臣某言伏奉勅命授臣特進荊國公加食邑四百戶食

實封一百戶勲如故者宮庭嘉享推惠術以及人田里

空餐濫宸恩而累國

中謝

伏念臣苦窳賤質卷曲散材

遭值休辰登備貴器有未償之厚責無可錄之微勞敢冀瘵身尚叨徽數此蓋皇帝陛下備成熙事答四表之歡心董正治官建一代之明制因令疲苴與被光榮雖自誓於糜捐顧何疇於責禱臣無任

賀貴妃進位表

侵盛之禮發於宮闈驪康之聲播於寰海

中賀

恭惟皇

帝陛下放古之憲刑家以身乃資婦德之良俾貳坤儀
之政蓋關雎之求淑女以無險詖私謁之心鷄鳴之得
賢妃則有警戒相成之道於以求助不專為恩臣生逢
明時竊觀盛事祝聖人之多子輒慕堯封思令德以式
歌豈慙周雅臣無任

賀生皇子表六道

臣某言都進奏院狀報誕生皇子者宮闈嗣慶寰海交
欣凡逮戴天惟均擊壤中賀臣聞螽斯之言衆子是為

王者之時華封之祝多男亦曰聖人之事恭惟皇帝陛下紹祖休顯憲天昭明致文武之憂勤成堯舜之仁孝宅師無競堯簞之寢既安傳類有祥弓韉之祠屢應詒謀方永錫羨用光臣託備蕃維叨承睿獎不顯亦世家實與於榮懷於萬斯年心敢忘於慶賴臣無任

二

臣某言伏覩進奏院狀報誕生皇子者嘉慶係傳歡欣摠集

中賀

臣厯觀古昔誕受福祥厥配天所以久長乃

有子至於千億伏惟皇帝陛下鳬鷺之雅媚于神祇芣
芣之風燕及黎庶弓韜嗣燕謀之報旒旗仍噩夢之祥
無疆惟休永保桑苞之固有室大競方觀椒實之蕃臣
嘗汙近司久尸榮祿特荷殊憐之至豈勝竊喜之情臣
無任

三

臣某言伏覩都進奏院狀報誕生皇子者皇運邳隆天
枝彌茂照臨所暨鼓舞攸均

中賀

臣聞史紀文慶之延

豈惟十子詩歌妙徽之繼爰至百男肇敏于修乃繁厥
祉恭惟皇帝陛下道冒區宇德冠往初品庶蒙休既饗
和平之樂神靈錫美果膺蕃衍之祥臣嘗汙近司備叨
殊獎以宿痾而自困欲旅進以無階臣無任

四

臣某言伏覩都進奏院狀報七月四日誕生皇子者
慶兆六宮欣交九服照臨所暨鼓舞惟均中賀竊以堯
寢告祥實帝臨之釐事牢祠錫羨乃神保於昌時伏惟

皇帝陛下追放堯勲嗣承犧象鴻名敷播已協九皇之
高純嘏垂延方覃千子之衆維祺有倂俾熾無疆臣夙
冒恩憐人尸榮祿適此驩嘉之會忝然趨造之難臣無
任

五

臣某言伏覩都進奏院狀報誕生皇子者元精孚佑
聖種挺生慶係集於宮庭歡外交於寰宇

中賀

竊以熊

罷見夢種桂獻祥厥撫會昌之期乃膺錫羨之福恭惟

皇帝陛下德高振古仁浹含生故神明之胄浸蕃而福履之將未艾臣久尸多祿特荷異恩顧衰疾之滋多望清光而獨遠臣無任

六

臣某言伏覩都進奏院狀報誕生皇子者燕謀饗德方儲錫羨之祥噩夢生賢克協會昌之運與在照臨之廣敷同慶賴之深切以思齊神罔時恫假樂民之攸暨天所保佑厥惟太姒之多男國之榮懷亦曰成王之衆

子恭惟皇帝陛下令德光乎洛誦康功茂乎岐昌鴻
休無疆景命有僕蓋芣苢之薄言采采衆皆先成則螽
斯之宜爾振振宗強孰禦臣久叨眷遇適阻進趨親值
本支百世之盛時敢忘壽考萬年之善祝

賀魏國大長公主禮成表

并周德
妃進封

臣某言伏以明告治庭寵頒恩冊家邦之慶海宇以欣
中賀恭惟皇帝陛下荷天闕休若古丕式自禰率而

尊祖備極靈承謂姊親而先姑特加徽數改錫厥壤增

褒所生大號已孚庶言惟允臣久尸榮祿竊睹盛儀臚傳雖異於九賓率舞尚同於百獸臣無任

賀冀國大長公主出降表

慶事備成恩紀隆洽有榮夷夏之觀厥孚邦國之休

中

謝

蓋聞勿恤於有家以祉而歸吉禮儀卒獲風化所原

不有在躬之清明其能由內而成熾恭惟皇帝陛下道光覆照教始親成篤念祖之至情致先姑之美義庶言無間徽典有加臣叨昧殊憐哀瘵遠屏親值榮懷之

日用忘呼舞之勞臣無任

賀魯國大長公主出降表

臣某言伏覩進奏院報魯國大長公主出降者占虵聘
夢祥實發於先朝奠鴈告期禮甫成於外館

中賀

臣聞

親成經五禮之始睦婣貫六行之中善與物昌慶惟時
賴恭惟皇帝陛下齊家而國治睦族而民雍恩隆天
屬之尊禮重王姬之降慎所選尚燕及文母之慈厚於
送歸追成穆考之孝臣叨陪興運獲覩盛儀雖句臚中

絕於九賓然呼舞外均於百獸臣無任

賀康復表

臣某言天佑俊德永錫康寧三靈一心所共欣慶

中賀

竊以執契踐運寶命在躬無疆惟休何恙不已伏惟皇
帝陛下堯仁舜孝充假彰聞惠于神民循道不越雖
勤勞庶慎衛養小愆而福履綏將旋日底豫平格獲祐
效驗甚明而臣衰疾所嬰久違宸宇聞傳踊躍倍百羣
黎臣無任

賀南郊禮畢肆赦表二道

臣某言伏覩十一月二十五日南郊禮畢大赦天下者
精意上昭神靈底豫茂恩旁暢夷夏接和

中賀

臣聞道

以饗帝為難禮以配天為至有秩斯祐唯四表之歡心
胡臭亶時匪九州之美味自古在昔若聖與仁厥遭昌
辰乃覩熙事恭惟皇帝陛下邁種三德敷奏九功率
籲奉璋之衆髦肇稱奠璧之新禮廟籩致孝郊血告幽
誠既格於穹昊福遂均於品庶振憂矜寡原宥青莪第

五玉以褒封善人是富發三錢而慶賜賤者不虛天其
居歆人以呼舞臣夙叨寵獎親值休成雖無與於駿奔
實不勝於竊抃臣無任

二

臣某言伏覩今月初五日南郊禮畢大赦天下者精明
條達神睠顧而依懷膏澤川流人歡呼而蹈厲

中賀臣

聞語孝之至莫大於配天議禮而輕不足以享帝能舉
釐事實歸聖時恭惟皇帝陛下鴻化已昭康年屢應

奔走籩豆有董正之治官潔豐粢盛有底慎之財賦禮成穀旦恩浹縣區雖洛誦之休明尚難譬稱豈兒寬之淺陋能盡揄揚臣夙荷慈憐方嬰衰瘵望九賓之紳笏獨遠句傳狎百獸於山林猶知率舞臣無任

賀明堂禮畢肆赦表

臣某言伏覩今月二十二日明堂禮畢大赦天下者蒐講上儀神天底豫敷施大號夷夏交欣

中賀

蓋聞聖以

享帝為難孝以嚴父為至周右烈考或委政而弗專漢

記諸神或竊禮而無實恭惟皇帝陛下道包衆甫運
會丕平巍巍成功堯之所謂大業業致孝舜之所由昌
洎選休辰肇稱嘉饗百禮既至而正惟已獨萬壽攸酢
而福與衆均臣久冒眷憐方嬰疾奉承籩豆乃獨後
於臣工踰舞笙鏞竊自同於鳥獸臣無任

臨川文集卷五十八

欽定四庫全書薈要卷一萬四千七百四十七

集部

臨川文集卷五十九

宋 王安石 撰

表

賀冬表八道

賀正表五道

辭免南郊陪位表

辭免明堂陪位表

詔免南郊陪位謝表

詔免明堂陪位謝表

加食邑謝表二道

賜生日禮物謝表五道

給蔡卞假傳宣撫問謝表

傳宣撫問并賜湯藥謝表七道

賜衣服銀絹等謝表

中使宣醫謝表

差張諤醫男勞謝表

賜厯日謝表二道

賀冬表八道

臣某言伏以庶彙潛萌上儀亞歲室告氣行之協臺占
瑞至之嘉恭惟皇帝陛下考敦復以大中籲朋來之衆
俊剛健之德與陽皆亨壽昌之期如日方永臣叨榮近
列攬疾殊方鳧趨獨後於在庭爵躍實深於存闕臣無
任

臣某言伏以寶厯無疆嘉時有倣物潛萌而赤色氣順

動於黃宮

中賀

恭惟皇帝陛下道協乾行德孚陽感體

一元而獨復毓萬寶以皆昌永御丕平備膺純嘏臣寢
嬰哀疾久隔清光迹雖屏於丘園志不忘於宸宇臣無
任

三

臣某言伏以萬寶潛萌應黃宮之協氣百工胥慶亞正

歲之上儀

中賀

恭惟皇帝陛下體御至神誦揚獨智

武烈丕承乎前載堯明光被乎多方茂對斯時備膺諸
福臣比緣衰疾獨遠清光雖存闕之不忘尚造庭之未
獲臣無任

四

臣某言伏以氣復黃宮茂對物滋之始晷移北陸寅賓
日至之長

中賀

恭惟皇帝陛下道與時行化猶天運

嗣無疆而履位建有極以宜民甫臨陽長之期大襲福
綏之慶臣恩容居里病阻造庭雖薦壽以無階顧馳心

而曷已臣無任

五

臣某言伏以陰偕物極陽與朋來推厯玩占乃見潛萌
之信體元御辨以知敦復之中

中賀

恭惟皇帝陛下

舜孝禹功文謨武烈茂對時之福嘏靈承旅以壽康臣
久冒朝榮外叨方任弗與稱觴之末豈勝存闕之深臣
無任

六

臣某言伏以候始三微氣萌萬彙謹觀臺之占瑞亞獻

歲以陳儀

中賀

恭惟皇帝陛下祇適燕謀靈承休運先

一陽而獨復歛諸福以朋來臣屬此養痾朞然在遠傾
心舜日欣寶景之踐長仰首堯天祝壽祺而等久臣無
任

七

臣某言伏以運與陽升晷偕日至儀亞三朝之會氣先
五刻之占

中賀

恭惟皇帝陛下茂對斯時備膺諸福御

至和之玉燭撫大順於璿璣臣竊望清光獨嬰衰疾徒有懷於率舞乃弗預於稱觴臣無任

八

臣某言伏以一陽氣復萬寶萌生天效五雲之祥律應三統之首茲為大慶允屬熙朝

中賀

恭惟皇帝陛下道

泰犧軒德深堯禹文物聲明之昭爛神祇祖考之安寧適丁至治之期矧及履長之序萬靈隤祉四海交歡而臣身處江湖地遙宸極瞻天日之表阻獻於壽觴望雲

龍之庭徒傾於驩頌臣無任

賀正表五道

臣某言伏以漢儀高會方登四海之圖周歷俯頒乃憲
百官之象

中賀

恭惟皇帝陛下含德淵懿撫辰休嘉乘

姑射之雲龍所更者化存胥教於蓬艾各遂其生運與
日升道侔乾始臣尚依粉社獨隔楓宸緬瞻朝著之班
竊慕封人之祝臣無任

二

獻歲初吉端月始和萬寶取新之元九儀告慶之會

中

賀

恭惟皇帝陛下體神蹈智抱一建中允迪暮勲永膺
孚祐德日新而有俶福時萬以無疆臣特荷寵光久嬰
衰疾雲天在望惟緬想於句傳麋鹿與遊豈暫忘於率
舞臣無任

三

寶厯無疆嘉生有俶厥初獻歲之吉乃始端月之和

中

賀

恭惟皇帝陛下常德日新景福時萬體泰元而難

老闕衆甫以皆昌臣久負異恩尚嬰衰疾瞻雲紛郁想
朝路以載欣愒日舒長與疇人而胥樂臣無任

四

寶厯無疆嘉生有俶門憲始和之象庭充元會之儀

中

賀

伏惟皇帝陛下膺保永圖綏將純嘏撫五辰而致
順毓萬物以皆昌臣久負異恩尚嬰衰疾瞻雲煥爛欣
逢舜旦之華擊壤逍遙樂得夏時之正臣無任

五

馭正夏時更端周厯體一元而敷惠適與春浮斂諸福
以代新方侔川至中賀恭惟皇帝陛下誕昭明德祇
燕孫謀齊七政以當天順五辰而凝績用求協氣以阜
嘉生閱千古之上儀肆三朝之盛會仰同星拱竦百辟
以在庭追效高呼極萬年而薦壽臣桑榆晚景麋鹿並
遊進莫與於臚傳退但知於率舞臣無任

辭免南郊陪位表

伏奉詔書令發來赴闕南郊陪位者萬國駿奔焯上儀

之殊觀一夫幽屏叨明命之特招

中謝

伏念臣竊祿已

多冒恩最渥自致惓惓之義實有素情再瞻穆穆之容
豈非榮願而杳然暮景櫻以沉痾伏畎畝以負茲於今
未已侍壇垓而踐豆用此為妨臣無任

辭免明堂陪位表

臣某言伏奉詔書令發來赴闕明堂陪位者合宮丕享
寰宇駿奔冒被優詔之加使陪顯相之末

中謝

伏念臣

投身荒遠上負眷憐企踵禁嚴久勞監寐況宗祈之盛

禮辱號召之明恩當即辦嚴豈容辭疾而沉冥浸劇黽
勉實難心若子年雖每存於魏闕身如楊僕乃自外於
漢關臣無任

詔免南郊陪位謝表

臣某言近具表為疾病乞免赴闕明堂陪位伏蒙聖
慈特賜臣詔書許免者螻蟻惓惓上千旒宸雲天顙顙
下賁丘園中謝臣億矣微生頽然暮齒冒恩鼎食非堅
卧以為高承命旌招宜駿奔而反後顧緣衰疾致隔清

光伏蒙皇帝陛下特赦尤違曲坐念聽鄙昏難望尚延
舜日之華荒翳易遺更獲堯雲之潤臣無任

詔免明堂陪位謝表

臣某言近具表為疾病乞免赴闕明堂陪位伏蒙聖慈
特賜臣詔書許免者駿奔弗獲內懷逋慢之誅寵荅曰
俞上荷眷憐之至中謝伏念臣久違祕近遂迫衰殘長
負異恩固難逃於幽黜敢圖釐事乃復與於詳延輒冒
布陳重煩矜允鴻私所被藏一札以知榮旅力已憊殞

百身而何及臣無任

加食邑謝表二道

臣某言伏奉詔命加食邑四百戶實封一百戶者顯相
郊宮固宜寵獎曠居田里乃濫褒嘉

中謝

伏念臣尚負

宿痾久尸榮祿無可論之薄效有未報之隆恩方國明
裡庶工祇載奉璋執豆旅幣獻琛具輸奔走之勞獨抱
滯留之歎豈圖踈逖亦冒龍光此蓋皇帝陛下荷休駿
厖歛福敷錫故雖幽屏弗以遐遺身每被於慈憐心

敢勞於勤策臣無任

二

解澤劾流明綸俯被永惟叨昧深以兢榮

中謝

竊以時

郊丘之承所以尊上帝疇官邑之賜所以富善人盛福
靡專至恩惟稱臣久塵要近上累昭明方玉輅之親祠
以銅符而外守逮均休慶例獲褒嘉此蓋伏遇皇帝
陛下以平施於萬方無遐遺之一物矧蒙圖任之舊特
荷獎知之深祇服訓辭敢忘報禮臣無任

賜生日禮物謝表五道

璽書加獎臺餽示優屈使者之光華發里門之榮耀

中

謝

竊念臣才非秀穎勢又羈單方少也臣父教臣以為

已之方及長也臣母勉臣以許國之節叨踰至此稱攷
缺然慈訓久孤每感劬勞之日恩頒荐至更慙明盛之
朝此蓋伏遇皇帝陛下智臨方來慈保臣庶嘉以物
多而備禮使知意厚而盡心敢不自竭斷斷之能庶以
少申惓惓之義臣無任

二

慰藉溢言匪頌異數荷恩勤之及此思報稱以茫然

中

謝

伏念臣謬簡神心叨陪大政以久孤之樸學當難遇之盛時雖罄愚忠何裨聖治門弧可想方永念於劬勞臺餽有加更上煩於寵獎此蓋伏遇皇帝陛下施仁品物致禮臣鄰將備責於安危故俯同於憂樂所願輸勞而後食敢知得賜之為榮矧生已之至恩已云不報獨事君之大義庶或無慙臣無任

三

臣某言伏蒙聖慈以臣生日特降詔書賜臣羊酒米麵
者書名閭史適在斯辰拜使家庭猥叨異數

中謝

伏念

臣才非經國幸實遭時徒塵宰席之延初乏辰猶之告
敢圖恩獎俯逮燕私此蓋伏遇皇帝陛下寵厚近班率
循前憲因令疵賤獲被龍光敢忘夙夜之勤以稱乾坤
之施臣無任

四

臣某言伏蒙聖慈特差臣男太子中允雱押賜臣生日
禮物衣一對衣著一百匹金花銀器一百兩馬二匹金
鍍銀鞍轡一副者勛勞之感方愴於私懷寵獎之加更
慙於異數

中謝

伏念臣早塵祿仕多厯歲年初無橫草

之勞但有敗林之愧進膺重仕久曠隆恩敢圖誕毓之
辰更冒匪頒之澤此蓋伏遇皇帝陛下惇修故事優眷
近司屈聖制以褒嘉示殊私於錫予永惟叨昧彌積震
驚撫已冥

闕

亮難酬於盛德惟時忠慎竊自誓於愚誠

臣無任

五

臣某言伏蒙聖慈特差入內內侍省內東頭供奉官
馮宗道傳宣撫問及就府賜臣生日禮物金花銀器
一百兩衣著一百匹衣一對金鍍銀鞍轡一副并纓複
馬二匹湯藥一銀合御封全者微勞不效僅逃三典之
科厚禮有加尚躡九儀之等中謝臣外叨寄屬仰誤眷
憐已隳考翼之基重負母慈之教迫勛勞於晚節方不

自勝惟蕃庶之舊恩終無以稱伏蒙皇帝陛下更馳
膚使曲喻至懷駟駿靈琛奇組麗豈下流之敢及皆
前此之所無金卮淑旂多錫誠榮於既往鈐刀駑馬強
扶難冀於將來雖天地弗責其謝生顧臣子敢忘於致
死臣無任

給蔡卞假傳宣撫問謝表

伏蒙聖恩以臣疾病特給蔡卞假將臣女子省侍令
卞傳宣撫問諭以調養者飭鑒遣使已叨訓勉於裊身

輟侍予寧重累顧哀於慈子教言狎至感涕交流臣趣
尚缺如遭逢榮甚竊食浮而廢任特負知憐昧祿殖以
挺災終貽罪疾伏遇皇帝陛下地容天幬雲蔭露濡
响吹晚出於更生拊偃申加於瀕死譬如造化難紀叙
於曲成雖曰糜捐敢稱論而上報臣無任

甘師顏傳宣撫問并賜藥謝表

臣某言膚使寵辭載華原隰寶奩珍劑加賁丘園臣

中

謝

伏念臣少出衡茅晚陪帷幄德輶寄重才淺知深但

念里居長負丘山之責敢期宸眷尚留簪履之矜此蓋
伏遇皇帝陛下天幬無疆海函不棄戴難忘之盛德
豈特銘肌撫易盡之餘生唯當結草臣無任

李舜舉賜詔書藥物謝表

臣某言輟宮闈親近之臣臨湖海寬閒之野授之藥物
撫以訓辭尸厚祿而無勞謂當誅絕捐大恩而不報彌
所兢慙臣中謝伏念臣本出羈單自甘淪棄晚由朴學
上誤聖知智曾昧於保身忠每懷於許國讒誣甚巧切

憂解免之難危拙更安特荷眷憐之至況遠迹久孤之地實適言易間之時而離明昭晰於隱微解澤頻繁於踈逖此蓋伏遇皇帝陛下以上仁含垢以大智容愚弗使南箕得侈歛揚之狀更令北戶坐蒙臨照之光茆然垂盡之病軀沲若橫流之感涕惟困窮無理猶致命於一餐顧冒昧不貲敢忘懷於九死臣無任

中使撫問謝表

臣某言孤臣疲曳自阻進趨上主慈憐猶加撫諭

中謝

伏念臣晚陪休運特荷異恩橫草無功每恨棄軀之晚
負薪有疾仍慙制祿之優豈謂陛下所揔萬機不忘
一物廼因輜軒之出俯逮躋屨之遺仰荷眷私唯知感
涕臣無任

二

臣某言去國彌年屢煩慰恤乘輅便道復賜撫存

中謝

伏念臣冒恩殊深奉事多廢久素終而無責方宿疚之
有加弗以遐遺實仰慙於眷遇莫知上報徒永誓於糜

捐臣無任

賜湯藥謝表

臣某言隆恩博施弗以遐遺弱力薄才豈能仰稱

中謝

臣久孤重任上誤聖知特荷眷憐備昭誠悃付以便安
之郡休其疲曳之軀跋涉之路未窮問勞之恩先至璽
書甚厚藥物兼珍此蓋伏遇皇帝陛下丕冒海隅寵
綏臣庶簪屨之舊不忍於棄忘雲天之高每存於庇幬
永惟報効徒誓糜捐臣無任

中使傳宣撫問并賜湯藥及撫慰安國弟亡

謝表

臣某言便蕃曲澤雖遠不忘晚晚餘年懼終莫報伏念
臣辭恩機要藏疾里閭既疲瘵之末夷顧憂傷之重至
仰煩眷獎特示閔憐中飭使軺備宣恩厚寵頒藥物深
念衰殘此蓋伏遇皇帝陛下日月照臨乾坤覆燾俯矜
舊物曲軫睿慈始終顧遇之私人知無替存沒榮懷之
感情實難勝臣無任

李友詢傳宣撫問及賜湯藥謝表

臣某言伏奉聖慈特差李友詢扶護亡男嘯棺柩到府并撫問者孤臣特荷慈憐未獲捐軀報德賤息比叨寵獎復以遺骨累恩臣

中謝

伏念臣釁積自躬凶

流及嗣因仍積歲藏厝不時敢謂私憂上貽聖慮伏蒙皇帝陛下飭遣親使護致旅棺使亡子之魂即安於窀穸天性之愛得盡於莫年申之訓辭撫以藥物眷被終始施兼存亡銘骨不足以叙欲報之心漚肝不足以繼

感泣之血獨恨既愆之力莫知自効之方臣無任

賜衣服銀絹等謝表

臣某言今月十一日准都進奏院遞到詔書并別錄賜臣衣服金帶魚袋銀器絹銀鞍轡馬者慰藉溢言上辜寵眷匪頒異數特荷慈憐臣晚以薄材嘗陪興運華原之簪未慙每辱矜收橋山之劍初遺獨悲淪沮伏蒙皇帝陛下勤追考翼厚勉臣中遽被寵光申加蕃庶雖負薪之末力難效驅馳顧結草之殘魂猶知報稱臣無

任

中使宣醫謝表

臣某言乘哀撓厲敢意浼聞輶舊垂矜曲加寵數即馳
近御兼飭太醫錫以寶奩實之珍劑創殘再肉顛眴更
蘇沓被慈憐不勝負荷臣叨恩缺報昧祿取災果崇降
以疾殃至上煩於愍惻此蓋伏遇皇帝陛下屢簪念
厚軒幄眷深天弗籲而亦臨雲甫瞻而既雨哀逾察父
感劇孤臣論可報之涓埃難知稱効顧未填之溝壑徒

誓糜捐撫涕洟瀾捫心躑躅臣無任

差張諤醫男雱謝表

臣某言伏蒙聖慈特差中使傳宣撫問并賜臣男雱
湯藥押冲靜處士張諤至本府醫治者叢爾餘生備叨
眷撫杌然賤息更荷哀憐

中謝

臣初乏將明之材適遭

開泰之運父子並蒙寵獎臣鄰莫與等夷去闕以來歷
時未久問勞狎至憂軫俯加以察父之鴻私施具臣之
晚節但慙疲曳莫副馳驅冀憑天地之恩得全駒犢之

命永依鞭策共誓縻捐臣無任

賜厯日謝表

臣伏以太史序年將謹人正之授遠臣尸祿乃叨天指
之加臣中謝竊以欽若昊穹靈承黎庶正時所以作事

治厯所以明時恭惟皇帝陛下道邁古初德綏方夏
治教之象上協於天心正朔所加外通乎海表敢圖幽
屏亦誤寵頒徒尊閣以知榮曷縻捐之可報臣無任

臣伏以清臺課厯肇明一歲之宜列郡仰成欽布四時之事闕文切抃拜賜為榮恭惟皇帝陛下躬包厯數政順璣衡齊日月之照臨體乾坤之闔闢考觀新度遠存堯象之明推步大端猶得夏時之正盡俯仰察觀之理槩裁成輔相之宜歲事備存詔文偕下先天誕告間無杪忽之差率土逢占驗若節符之合臣敢不恭承闕順考時行贊聖神化育之功極天人和同之効奉而行政期不戾於陰陽推以治人庶克躋於富壽臣無任

臨川文集卷五十九

欽定四庫全書薈要卷一萬四千七百四十八

集部

臨川文集卷六十

宋 王安石 撰

表

兩府待臯表

請皇帝御正殿復常膳表二道

乞罷政事表一十三道

手詔令視事謝表

添差男雋勾當江寧府糧料院謝表

詔以所居園屋為僧寺及賜寺額謝表

依所乞私田充蔣山太平興國寺常住謝表

辭免司空表二道

乞致仕表

兩府待臯表

臣某等伏覩內降德音以陝西河東兩路外勤師旅內
耗黎元引咎推恩者臯已以興方懋日新之德經邦弗
效敢辭天討之刑

中謝

臣等昔以九材過叨重任內不

能定國家之論以協士民外不能成疆場之謀以綏夷
狄用開邊隙亟使人勞至深惻於聖懷實大愆於榮祿
瘝官若此即臯為宜唯並寘於嚴科乃大符於公論臣
等無任

請皇帝御正殿復常膳表二道

臣等言奉聖旨以祈雨未應避正殿減常膳者陽春
生物偶霑澤之稍愆睿意恤民遽側身而自抑德已修
於銷變數或係於非常當復彝儀用安羣下

中謝

恭惟

皇帝陛下天仁博施神智曲成躬忘旰食之勞坐講日
新之政四時協序萬物致和適當化養之辰宜得涵濡
之澤少違常候深軫清衷退師氏之正朝約太官之盛
饌仰窺謙德志在閔民然而遐虜來朝當即法宮之位
誕辰入慶合陳燕俎之珍事有所先禮難偏廢伏願仰
回淵聽俯徇輿情夙御九筵之居並羞十閣之具上以
全於國體下以副於臣誠臣無任

臣某等言近上表請御正殿復常膳蒙降批答不久者
時澤偶愆屢勤齋禱聖衷愈勵曲盡焦勞將損已以召
休因退次而貶食列陳剡奏尚闕嗣音在臣列之靡遑
伏帝閣而再叩中謝恭惟皇帝陛下體居離正德稟乾
剛期揉俗以致康嘗納隍而興念七載于此繼獲豐穰
一春而來或罹愆亢皇慈深軫羣祀徧修恐狴犴則
親慮其囚懼黼黻美則躬變其服仍損內饗之舉兼虛
正寧之朝然而禮貴從宜事難泥古而況甫臨誕節交

舉慶儀有列辟拜萬年之觴有殊俗修兩朝之好苟虧
彛制難副羣情少屈淵衷特從誠懇天臨廣廈日御常
珎親事法宮廓宣於政治惟辟玉食昭示於等威仰以
慰兩宮之慈俯以安羣下之望臣等無任

乞罷政事表三道

臣某言竊以使陪國論惟亮天工必用強明乃能協濟
豈容昏瞶可以叨居進冒聰明罄陳危悃中謝伏念臣
逮侍先帝列官外朝晚以喪歸因為病廢伏遇皇帝陞

下召還辭禁擢豫經筵收於衆惡之中諏以萬機之事
構讒誣而並至輒賜辨明推孤拙以直前每蒙開納陞
下所以遇臣者可謂厚矣臣之所以報國者終於缺然
豈理勢之獨難抑才能之素薄方懼過尤之積乃罹疾
疾之加比欲外乞州藩冀以就營醫藥重念米薪之弗
給尚何守土之敢謀輒緣不能者止之言庶免貪以敗
官之悔伏望皇帝陛下曲垂仁惻俯記愚忠賜以分司
一官許於江寧居止則天地之德實有施於餘年犬馬

之勤冀或輸於異日臣無任

二

臣某言近具表乞罷政事分司伏奉手詔封還不允
所乞者私懷懇至已具布聞聖訓丁寧未蒙開納敢
冒崇高之聽再輸悃悞之情

中謝

臣聞任賢之方要其

有用陳力之義止於不能苟弗集於事功且重罹於疾
疾豈容叨據以累明揚伏念臣猥以孤生親逢盛世昧
於量已志欲補於休明失在信書事浸成於迂闊每煩

衆論上恩聖聰久知素願之難諧繼以積病而自困辭
而去位庶逃竊食之誅勉以就工重荷包荒之德雖貪
順命終懼妨功伏望皇帝陛下閱度并容大明俯燭
特垂矜允俾遂退藏如此則孤進之身獲全生於末路
具瞻之地得改命於時材臣無任

三

臣某言近再具表乞罷政事伏奉批荅不允者封奏上
昭未能感徹訓辭下逮更誤褒嘉

中謝

臣聞恕以及物

者君之仁量而受事者臣之義蓋世之道有升而有降
故士之行或肆而或拘遭聖治之尚容冀私誠之獲遂
伏念臣自蒙任使已歷歲時雖或售於小忠曾莫裨於
大政迨茲撓疾乃始告勞姑以免邦憲之誥誅何足汗
上恩之獎勵使人狎至詔指屢頒祇荷顧憐重懷感悸
非不願粗施其樸學庶幾以仰副於鴻私顧惟剛德之
浸亨方奮睿謀而獨斷辨忠賢之可任既示弗疑察姦
罔之為朋將知所畏人宜盡力朝豈乏材寧容昏憊之

餘尚冒寵靈之厚伏望皇帝陛下離明俯燭解澤苟
施矜綿力之既愆監近司之或曠俯從控懇實允詢謀
雖已事之無稱難言報國冀餘生之未泯尚獲捐軀臣
無任

乞出表二道

臣某言竊以丞相之職天子是毗方當圖政之憂勤難
以養痾而昧冒輒輸情素仰丐恩憐

中謝

臣叨被鴻私

誤尸榮祿堯仁天覆幸荒穢之兼包湯聖日躋顧卑凡

而自絕尚惟許國姑誓忘軀豈意眩昏甫新年而寢劇
更知駑蹇難重任之久堪伏惟皇帝陛下明燭隱微
惠綏羈拙閔其積疾收還上宰之印章賜以餘年歸展
先臣之丘壟生當擊壤以詠矜容之德死當結草以酬
含育之恩臣無任

二

臣某言今月十一日輒輸情素仰丐恩憐實以抱疾之
深難於竊位之久過蒙敦獎未賜矜從事有迫於懇誠

理必祈於哀惻

中謝

臣信書自守與俗多違審容膝之

易安因忘擇地知戴盆之難望遂廢占天豈圖憂患之
餘更值清明之始寒之之日長而暴之之日短植之之
人寡而拔之之人多尚誤聖知驟妨賢路摩頂放踵雖
願效於微勞以蚊負山顧難勝於重任矧復瞶昏而曠
事若猶冒昧以尸官是乃明憲之所不容豈特煩言之
為可畏伏惟皇帝陛下天地覆載日月照臨賜以曲
成容其少愒區區旅力或未愍於餘年斷斷小能冀尚

施於異日臣無任

乞退表四

臣忠於為國故進而能致其身君恕以及人故病則閔
勞以事此今昔共由之通義實上下相與之至情敢觸
冒昧之誅冀蒙哀矜之聽

中謝

臣受材鄙劣遭運休明

陳愚或會於聖心承乏遂尸於宰事謀謨淺拙謾不見
其有成操行陵夷又或幾於無恥久宜辭位尚苟貪恩
豈圖養拙以乖方重以瞽昏而廢務粗嘗陳列未獲矜

從黽勉以來浸淫遂劇大懼典司之曠上煩程督之嚴
伏惟陛下詢事考言循名責實或輟夜分之寐常臨
日昃之朝萬方黎獻之多略皆祇辟三事大夫之守豈
可瘵官仰冀高明俯昭惻愍念其服勞之久愍其撓瘵
之深及未干鈇鉞之時令遂解機衡之任豈特少安於
私義茲惟畢協於師虞臣無任

二

臣昨具表乞解機政伏奉手詔未賜俞允者明主訓

辭之寵宜即奉承匹夫志守之愚敢覬矜允

中謝

竊以

品制百為摠裁萬務任怨蓋難於持久服勞安可以獨
賢所以中外迭居是為祖宗故事沉於疲曳加以瞽昏
若由昧冒而無慙其必顛隳而不救臣過叨睿獎備進
近司當循名責實之時故任怨特多於前輩兼蠲令改
制之事故服勞尤在於一身雖蒙全度之恩僅免譴訶
之域某於多故實以難支矧疾疢之交攻且事為之浸
廢伏望陛下昭其惻怛假以優游使得休養於哀疲

以示保全於孤拙臣無任

三

臣某言近具表乞解機務伏奉手詔未賜俞允者聖恩所及有隆天重地之施私義未安有深淵薄冰之懼

中

謝

竊惟成湯高宗之世有若伊尹傳說之臣其道則格于帝而無疑其政則加乎民而有變后惟時又相亦有終迨乎中世之陵夷非復古人之髣髴忠或不足以取信而事事至於自明義或不足以勝姦而人人與之為

敵以此乘權而久處孰能持祿以少安此臣之慮危於
居寵之時而昧死有均勞之乞況於抱病浸以瘵官伏
惟陛下道與日躋德侔乾覆哀一夫之失所樂萬物之
皆昌矧夫眷遇之優既已勤勛之久宜蒙善貸使獲曲
全賜其疲賤之身假以安閒之地則敝車無用猶可具
於勞薪棄席未忘或再施於華幄臣無任

四

臣某言伏奉聖旨令臣入見赴中書供職者螻蟻微誠

屢關省覽天地大德未賜矜從

中謝

臣聞周之士也貴

秦之士也賤周之士也肆秦之士也拘其縱之為貴其拘之為賤賤故尚勢利而忘善惡貴故尊行義而矜廉耻士知尊行義而矜廉耻宗廟社稷之安而天下自治也伏惟陛下言必稽堯舜動必憲文武故視遇天下之士欲其貴不欲其賤欲其肆不欲其拘臣以羈孤芻無飲助一言寤意特見甄收適遭欲治之盛時實預扶衰之大義事或垂於衆口而陛下力賜辯明言有逆於聖

心而陛下常垂聽納此臣所以履艱虞而不怠服勤苦而不辭雖百度搶攘未就平成之叙然四年黽勉非無夙夜之勞今特以心氣之衰疲目力之昏耗哀祈外補冀幸小休而乾剛確然莫可回奪則是親值周家之忠厚獨為秦士之賤拘事與願違能無竊歎理當情恕豈免止煩實望聖慈俯昭愚款外賜優閒之地少安疾疢之身須其有瘳乃責外効臣生當捐軀以報德死當結草以酬恩

乞宮觀表四道

臣某言疏榮特異敢忘圖報之忠陳力弗能當布可辭
之義

中謝

伏念臣晚陪興運久汗近司臆愚弗逮於清

光衰疾更成於瘵曠苟免大訶之責乃叨異數之加授
以戎旃班之宰席松楸舊國實使鎮臨蒲柳殘年足為
榮耀顧在宣化承流之地方當循名責實之時疲曳難
支顛隳可畏仰祈睿眷俯徇愚衷并解將相之官外除
宮觀之任託依田里瞻守丘墳儻憑休養之私終獲夷

瘳之福敢忘策勵復誓糜捐臣無任

二

臣某言近具表乞以本官外除一宮觀差遣伏蒙聖慈特降中使賜臣詔書不允者天地至恩實知難報螻蟻微息尚竊有懷輒冒隆威更輸危悃伏念臣遭逢異甚稱効蔑如苟旅力之可陳豈餘生之足惜顧以憂傷而至弊重為疾疾之所撓偷假便州必負曠瘵之責過尸厚祿更懷叨昧之慙伏望陛下本末燭知始終護念俯

徇籲天之懇俾無累國之尤尚冀寧瘳誓終糜殞臣無任

三

臣某言軺傳俯臨璽書狎至仰荷眷存之厚第懷感悸之深任有不勝勉非所及輒輸危懇再冒天威伏念臣久誤至恩難圖報稱過尸榮祿易取災危力億矣而弗支氣喘焉而將蹶窮閭掃軌斯為待盡之時幕府建旄豈曰養痾之地所懼曠療之責敢辭逋慢之誅伏望陞

下照以末光遂其微請使壇陸之鳥無眩視之悲濠梁之魚有從容之樂庶蒙瘳復更誓糜捐臣無任

四

臣某言筋骸衰朽僅有餘生肝膈精微簡在聖聽豈圖寵獎未賜矜從輒冒威尊更輸情素

中謝

伏念臣久妨

機要初乏涓埃苟免庶尤實荷恩私之至敢緣多疾更尸名器之崇比辱使軺係宣詔旨深惟策勵仰稱龍光而況病瘵有加療治無損辭榮家食乃為理分之宜干

澤自營尚恃眷憐之舊伏惟皇帝陛下衡聽萬事器使衆材念其黽勉之終難假以便安而少愒庶完體力圖報毫分臣無任

手詔令視事謝表

臣某言伏蒙宣示言者所奏輒具劄子乞博延公議改用賢人伏奉詔獎勵令視事如故者謗議升聞已賴舜聰之豁達懇誠上訴更煩周誥之丁寧竊以作威者主之權待察者臣之禮蓋雖蒙非常之厚遇亦將避可畏

之煩言臣志尚非高才能無異舊惟所學之迂闊難以趨時因欲自屏於寬閒庶幾求志惟聖人之時不可失而君子之義必有行故當陛下即政之初輒慕昔賢際可之仕越從鄉郡歸直禁林或因勸講而賜留或以論思而請對愚忠偶合即知素願之獲申睿聖日躋更懼淺聞之難副重叨殊獎忝秉洪鈞所宜引分以固辭乃敢冒恩而輕就實恃明主知臣之有素故以孤身許國而無疑人習玩於久安吏循緣於積弊竊言不忌諛行

無慙論善俗之方始欲徐徐而變革思愛日之義又將
汲汲於施為以物役已則神志有交戰之勞以道徇衆
則事功無必成之望恐上辜於眷屬誠竊幸於退藏猶
貪仰附於末光亦冀粗成於薄効比聞獨斷謂合僉言
但輸承命之忠遂觸招權之毀因請避衆賢之路庶以
厭異議之人伏蒙皇帝陛下敦大兼容清明旁燭賜之
神翰諭以至懷君臣之時嘗千載而難值天地之造豈
一身之可酬敢不自忘形迹之嫌庶協神明之運臣無

任

添差男雱勾當江寧府糧料院謝表

臣某言近輒冒昧陳乞男雱勾當江寧府糧料院一次
伏蒙特恩添差者去寄臥家猶尸厚祿祈榮及嗣更荷
殊私

中謝

伏念臣汗馬之勞初無可紀舐犢之愛乃敢

有言顏雖腴以知慙心固甘於獲譴豈謂陛下矜軒輊
之舊錄簪屨之微示特出於上恩俾遽叨於世祿繫曲
成之造化弗以遐遺徒共誓於糜捐安能仰稱臣無任

詔以所居園屋為僧寺及賜寺額謝表

臣某言基迹叢祠冀鴻延於萬壽錫名扁榜竊榮遇於
一時臣生乏寸長世叨殊獎賤息奄先於犬馬頽齡俯
迫於桑榆獨念親逢莫有消埃之補報永惟宏願豈忘
香火之因緣伏蒙皇帝陛下俯徇祈誠特加美稱所懼
封人之祝終以堯辭乃塵長者之園遽如佛許仰憑護
念誓畢熏修臣無任

依所乞私田充蔣山太平興國寺常住謝表

臣某言緣恩昧冒方虞恩上之誅加意畀矜遂竊終天之幸伏念臣少嘗陞阨晚悞褒崇榮祿雖多不逮養親之日餘年向盡更為哭子之人追營香火之緣仰賴金繒之賜尚復祈恩而不已乃將徼福於無窮伏蒙陛下眷遇一於初終愛恤兼夫存沒特撓常法俯成私求雖老矣無能莫稱漏泉之施若死而未泯豈忘結草之酬臣無任

辭免司空表二道

臣某言今月十一日三班差使崔汝諧至奉宣詔旨及
齎賜制誥一道除授臣司空依前觀文殿大學士集禧
觀使加食邑四百戶食實封一百戶餘如故者使輶馳
授祇忝明恩家巷卧居敢叨虛獎

中謝

竊以事官之所

命異於時制之今除名稱三公班序一品逢辰特幸稱
位實難臣晚玷誤恩嘗尸劇任曾無尺寸粗報眷憐獨
有丘山莫知負載荒遠撓痾之久休明嗣服之初緜力
薄材適甘於屏棄高秩厚禮更冒於褒崇惟器與名恐

身累國仰祈遷令追寢贊書庶以哀殘獲所安之終吉
亦令蹇淺免非據於具瞻臣無任

二

臣某言近具表乞追寢恩命伏蒙聖慈特降詔書不允
者隆施所逮懇辭弗俞輒冒天威更輸微款

中謝

臣事

勞無紀操行不修居竊萬鍾初未知於辭富坐彌九載
方有俟於黜幽豈圖邦命之新尚眷求人之舊寵靈單
被危厲增加位高疾顛力少任重實前修之切戒敢小

醜之冒膺仰冀睿明顧憐衰朽改茲非服免貽官謫之
憂宥以罔功使獲里居之佚臣無任

乞致仕表

此表不曾奏發
薨後檢見遺藁

臣某言竊以曠官嘗恃食功之舊老而辭祿敢忘知止
之廉輒冒天威具輸微款伏念臣小聞寡識薄力淺材
信獨善以一心昧自營之百慮久辜視遇特幸遭逢昔
也壯時尚無可紀今而耄矣豈有能為敢望睿明許之
致仕實矜危朽賜以全生庶以衰殘豫佚太平之樂亦

令遲暮免離大耋之嗟

臨川文集卷六十



總校官庶吉士臣張能照

校對官檢討臣龔大萬

謄錄監生臣張子誠

欽定四庫全書薈要

集部

臨川文集卷六十一至
三



詳校官助教臣常循

欽定四庫全書薈要卷一萬四千七百四十九

集部

臨川文集卷六十一

宋 王安石 撰

表

賀冊仁宗英宗徽號禮成表

賀景靈宮奉安列聖御容表

賀哲宗皇帝登極表

賀升祔禮成表

英宗山陵禮畢慰皇帝表



又慰太皇太后表

又慰皇太后表

英宗祔廟禮畢慰皇帝表

又慰太皇太后表

又慰皇太后表

慈聖光獻皇后昇遐慰皇帝表

慈聖光獻皇后啟殯及復土返虞慰皇帝表二

道

慈聖光獻皇后神主祔廟慰皇帝表

慈聖光獻皇后碁祥除慰皇帝表

正旦奉慰表

魯國大長公主薨慰表

八皇子薨慰皇帝表

八皇子葬慰皇帝表

謝宰相笏記

謝翰林學士笏記

知常州謝上表

南郊進奉表

代鄆州韓資政謝上表

代王魯公乞致仕表三道

代人賀壽星表

代人明州謝上表

代王魯公德用乞罷樞密使表三道

賀冊仁宗英宗徽號禮成表

臣某言伏覩進奏院狀報冊告仁宗皇帝英宗皇帝徽
號禮成者肇稱縟禮追薦鴻名揚二聖之閔休風四海
以純孝惠心昭假釐事備成臣

中謝

恭惟仁祖以堯之

巍巍丕冒區夏英考以舜之業業祇承廟祧紹隆德至
於難名崇報義存於無已皇帝陛下仰稽前憲俯采庶
言命冊使而致嚴告匱主而歸美神靈率籲其啓後於
無疆品庶交欣以奉先而不匱臣備叨殊眷獲睹上儀
顧久負於沉疴乃獨妨於旅進

賀景靈宮奉安列聖御容表

臣某言新一代之上儀極二端之美報經始有倣實自
睿謀歡成無疆乃惟衆志臣

中謝

竊以闕宮鬼享周特

腆於姜嫄原廟神游漢獨隆於高帝遠或遺祖近止及
親恭惟皇帝陛下服卑而即功食菲以致孝嚴祖宗之
衆像依仙釋而異宮館御因時初豈忘於苟簡修除備
物乃有待於純熙宸宇祕嚴扁榜崇麗裸獻式序妥侑
維時藐然往初孰此倫擬臣久尸榮祿尚負宿疴聞釐

事之既成與羣情而偕樂臣無任

賀哲宗皇帝登極表

臣某言伏覩赦書皇帝陛下今月五日登寶位者郊廟
神靈永有宗依華夏蠻夷永有歸賴

中謝

恭惟皇帝陛下

下光御歷服大承統緒以聖繼聖純祐無疆臣遭遇先
朝久叨榮祿不獲奔走瞻望清光臣無任

賀升祔禮成表

臣某言伏覩進奏院狀報七月十二日升祔禮成者消

選休辰肇稱吉禮神靈底豫品庶交欣

中謝

竊以登儷

紫庭歸配清廟於稽在昔有舉維時恭惟皇帝陛下德
茂承祧志深念祖倣唐文而制作致舜孝於烝嘗釐事
既成歡心溥協臣尚櫻衰疾久隔清光陪九賓之臚傳
獨無厚幸偕四方而來賀徒有微誠臣無任

英宗山陵禮畢慰皇帝表

臣某言須百祀之材已襄葬故設九虞之主方考祔儀
伏惟皇帝陛下德懋欽明道隆勤孝雖送終之禮已備

而追遠之念甫深惟順變以抑哀實含生之至願臣限分鎮守阻豫班朝臣無任

慰太皇太后表

臣某言宮車云返陵邑既營凡在照臨豈勝摧慕伏惟太皇太后道侔坤育仁出天成永懷愛孝之隆尤積悲恫之感稍舒慈念實慰輿情臣叨備從官限分符守徒有攀號之至痛初無辦護之微勞臣無任

慰皇太后表

臣某言威靈有集方祔於廟祔感慕無窮外覃於蠻貊
伏惟太后比賢任姒續慶塗莘祇協孫謀克襄大事地
非蒼梧之遠勢有霸陵之安唯割至哀尚膺遐福臣備
官有守奔問無階臣無任

英宗祔廟禮畢慰皇帝表

臣某言七月而葬既充奉於寢園萬世不祧遂崇成於
廟室凡居履燾同盡攀號伏惟皇帝陛下膺保聖神踐
行仁孝纏哀罔極率禮無違仙遊既集於宗祊聖念彌

勤於翼室仰祈順變俯賸含生臣符守所櫻班朝莫豫
臣無任

慰太皇太后表

臣某言威靈來返祠廟有嚴序陳昭穆之倫定列祖宗
之次哀號罔極遐邇所同伏惟太皇太后功佐帝圖德
齊坤載永惟孝愛尤積悲懷冀紓天性之慈以永母儀
之福臣無任

慰皇太后表

臣某言宗祏告成皇靈來燕凡居覆露同盡哀摧伏惟
太后協慶塗山比賢太姒方正坤儀之位上同乾施之
仁虞祔奄終攀號靡極冀哀恫之有節膺福履之無彊
臣限守州符阻趨天陛臣無任

慈聖光獻皇后昇遐慰皇帝表

臣某言伏以上天降禍太皇太后奄棄大養伏惟皇帝
陛下攀號感慕聖情難居臣限以衰疾在遠不獲奔赴
闕庭臣無任

慈聖光獻皇后啟殯及復土返虞慰皇帝表
臣某言伏以日月徂遷伏承太皇太后誨辰協吉肇啟
殯宮聖情攀號何以勝處恭惟皇帝陛下聖孝發中天
報備至感嘆摧咽遐邇一情臣無任

二

臣某言伏承太皇太后神宮復土奄及返虞聖心傷摧
何以勝處恭惟太皇太后天助懿德以扶昌運輔佐保
佑功施三朝粵自棄捐宮闈爰及襄事陛下哀恫夙夜

發於至情追奉致隆有溢常禮顯情報德內外單盡孝
治所形人用感歎臣伏限在遠無緣奔走瞻望闕庭臣
無任

慈聖光獻皇后神主祔廟慰皇帝表

臣某言伏承慈聖光獻皇后神主祔廟既克禮成伏惟
皇帝陛下聖孝終始哀慕難勝日月徂遷禮有順變伏
望少抑至情以幸天下臣無任

慈聖光獻皇后暮祥除慰皇帝表

臣某言伏以日月流邁太皇太后捐棄大養奄及替祥
仰惟聖孝攀慕無極伏望深加裁抑以幸萬方臣限以
衰疾無緣奔詣闕庭臣無任

正旦奉慰表

臣某言伏以日晷流邁歲歷肇新太皇太后棄捐宮闈
奄厯時序伏惟皇帝陛下聖孝天至感慕難勝臣以衰
疾無緣奔走瞻望闕庭臣無任

魯國大長公主薨慰表

臣某言伏覩進奏官狀報魯國大長公主薨背伏惟聖情痛悼臣以衰疾無緣奔走伏望以理寬釋俯慰群情臣瞻望闕庭無任

八皇子薨慰皇帝表

臣某言伏覩進奏院報八皇子薨背伏惟聖情悲悼難任敢乞抑割天慈以幸萬邦臣瞻望闕庭無任

八皇子葬慰皇帝表

臣某言伏聞鄆王襄事有日靈輜卽路伏惟聖情悲悼

難勝敢乞割抑天慈以幸天下臣瞻望闕庭無任

謝宰相笏記

祇荷寵靈載懷感懼竊念臣志雖慕古才不逮時誤蒙
記憐特賜收用伏惟皇帝陛下紹膺天統遵養聖功苟
招僞良橫及疎賤誓當罄竭仰稱寵光臣無任

謝翰林學士笏記

含哀去國扶憊造朝黼坐禁嚴許之燕見玉堂閎麗賜
以叨居申飭使人就傳德意事雖有故寵實非常莫知

金史四庫全書
卷六十一
報稱之謂何徒荷眷求之如此臣無任

常州謝上表

臣某言以貧擇利以病辭官此於督責之朝皆在譴呵
之域中謝伏念臣比在羣牧常求外官蒙恩朝廷改職

畿縣未識賢勞之力已纏悻眩之疴區區本懷懇懇自
訴遂蒙優詔特與便州維臣之愚所學非敏受祿則辭
貧而取富當官則讓劇而求閒使有以臨知罪其極此
盖伏遇皇帝陛下明照萬物寬惠四方在宥而不探其

可誅因能而不責其所乏顧雖無用於當世嘗以有聞
於先臣思報所蒙敢忘盡瘁然而州郡撫循之勢患在
數更官司考課之方要諸久任惟此弊邑比多凶年歲
行兩周守吏八易當郡人煩勞之後以臣身疲病之餘
自非少假以歲時將必上孤於器使所祈降鑒姑使息
肩則斷斷一臣不獨免於大戾元元萬室儻有望於小
休臣瞻天禱聖無任

南郊進奉表

江寧

臣某言伏以郊禋宗祈臣工顯相慶九畿之藩屏備萬物之貢輸前件物掌於邦財歛自民職竊覩燎禋之盛式修幣獻之常臣無任

代鄆州韓資政謝表

臣某言秘殿升華名城借重寵靈溢分媿懼交懷

中謝

竊念臣世系單平天姿滯固親逢文雅之會首玷秀廉之科黽勉在公優游過紀被蒙眷與度越等夷省寺備官禁庭充衛分無可采懼抵冒於憲章寸有所長使裨

參於治政朴忠自信智慮罕通未盡將明之才已干訶
謫之典至寬之度橫貸其愆褫夫左右之聯寄以東南
之屏敗財傷錦宜有衆多之譏增秩賜金本非平素之
望敢圖上聖復眷孤臣就徙通班改司善部惟汶陽之
奧壤乃魯服之大邦豈繫薄材稱是煩使此蓋皇帝陛
下遇臣之造於遠不忘燭物之明雖微必逮追惟跼屨
之舊特借叢雲之休切自揣循將安報稱敢不激昂志
尚陳悉政經宣布詔條之寬綏安風俗之厚庶幾一得

少補萬分臣無任

代王魯公乞致仕表

德用

臣某言臣聞下之所以忠於上力已愆則不敢瘵厥官
君之所以愛其臣年已至則不思勞以事敢緣茲義冒
盡所言中謝伏念臣以斗筭之材加犬馬之齒比嘗得
謝誤復見收血氣既衰日月逾邁固已積妨賢者之路
豈獨多曠朝廷之儀伏望聖慈許令致仕則賴天之力
使終晚節之優游訖臣之身得免大誅之憤眚臣無任

二

臣某言愚臣之在暮年禮當求去聖主之於舊物恩不忍捐顧在禮之可言敢緣恩而苟止

中謝

伏念臣起身

疵賤逢世休嘉年除歲遷遂塵於非望夙興夜寐常媿於無勞惟是寵榮殊非所欲矧知固陋豈敢為高徒以歲路之向窮不勝人言之甚衆爭前而冒寵則辱之在後也或多蓋衆以擅榮則患之及身也常酷是亦有傷於國體豈惟無補於臣身此臣所以迫切於歸誠而彷徨

惶於受命也況陛下接三后之烈享百年之平勢盈則
非易以持法久則當通其變此誠致慎於安危之際而
責難於將相之時雖臣旅力之方剛亦宜知止豈此餘
生之無幾尚可妨賢伏望天慈俯循人欲上以終愛人
之德下以免累國之誅則膺力既愆雖負捐軀之素志
餘忠未訖猶知請祝於明時干冒宸嚴臣無任

三

臣某言竊以將相之權臣之所貪得君親之命臣之所

憚違懇懇至於辭說之窮區區亦惟義理之迫中謝伏
念臣典司機密陪輔清光年之侵尋職以曠廢假息幸
蒙於寬政引身輒勾於餘年豈期愚衷未動聖察令臣
股肱便敏足以趨賓贊之儀耳目精明足以副謀謨之
託雖知當退猶願自強奈何獨以罷癯之軀而欲久私
要劇之地自計且知其不可人言孰以為當然伏望聖
慈哀憐悃悃無空敦獎使得罷休臣無任

代人賀壽星表

臣某言上靈儲祉南極效祥凡在觀瞻實增慶抃伏以
皇帝陛下紹休三聖博愛萬方唯乾則之裴常宜星文
之底應臣叨庶要近親會休嘉豫聞太史之占敢後封
人之祝無任

代人上明州到任

臣某言奉勅差知明州已於某月到任亢夷越故區東
南窮處施澤之下歡然有生庇身於茲坐以無事

中謝

臣受材素薄推數頗奇居有朴忠之心進無通顯之路

晚塵郎位頗切郡章歸待臯於省中退得藩於海上自
初受命以至造官歷年兩周取道萬里備更艱阨職臣
之分使然卒就宴安賴上之恩抵此餘年且索旅力已
愆尚何施為可以報稱於苟利國家之事靡所不思及
未填溝壑之時庶幾無愧臣無任

代王魯公德用乞罷樞密使表

臣聞周任有言曰陳力就列不能者止自惟賤官之守
猶或不敢冒居況於任重責大安危所繫豈其瘖昏憊

耄可以久饗敢緣前言上冒聖聽伏念臣以疵賤之身
遭逢陛下拔擢兼官將相典領機密內之無陪輔將明
之効外之無折衝禦侮之勞是陛下所以寵臣者不可
勝言而臣之所以報陛下者未嘗能稱況今犬馬之齒
七十有七不能者止宜在此時顧貪戀聖世未敢乞身
田里長違陛下左右惟機務之衆非臣疲曳所能勉強
伏望陛下憫臣無狀賜罷樞密院職事毋使久塞賢者
之路臣不任祈恩待命激切之至

二

臣比以殘餘之生久壅賢路願還要職退就散地天聽高邈未蒙照省惓惓之私竊不自寧敢緣厚恩求必愚瞽臣聞量臣以授官者君之所以仁於下也審已以從事者臣之所以忠於上也今臣罷老雖近在臣身謀之有所不給況於官隆事劇所摠不一以臣審已誠不宜久叨權寵畏負陛下任使之意伏惟陛下量臣之聰明不足以逮事量臣之強力不足以副禮聽臣所丐毋令

四方有議陛下信任之失而臣亦賴陛下之賜免於官
謫臣無任

三

惓惓之私至于再三上恩聖德而終未蒙省察獎誘過
渥非臣所堪區區之愚豈敢苟止伏念臣以顓蒙遭遇
拔擢人臣貴寵少在臣右而勞烈行治無稱於時機密
之地安危所繫雖臣方壯固懼不稱況於殘年餘日豈
宜尚汚印鞞為朝廷羞方今明明在上濟濟多士足以

典司樞要補敝救失稱陛下任使副元元之望者甚衆
陛下雖欲苟私愚臣臣雖欲自侍左右稱所以幸臣之
意豈惟公論於臣有所不容誠恐覆餗以虧陛下知人
之明而令賢能宜在高位者久踣於聖世則夷身毀宗
不足以塞責矣伏惟陛下哀臣懇迫聽臣所丐以終陛
下眷寵老臣之賜臣無任

臨川文集卷六十一